

SAN JUDAS

Judas Jesúre buremurārē gojadea

¹Yu Judas^a, Santiago pagumu Jesucristore moáboegu musārē i pūrē gojáa. Marīpu musārē maīgū beyedi āārímí, Ígūyarā āārīburo, ārīgū. Jesucristo musārē koremi, ígūrē buremurīrē piribirikōāburo, ārīgū.

²Marīpu musārē būro bopoña, maírī merā iāburo. Musārē siñajārī sīburo.

Ārīkatori merā buerimasāyamarē gojadea

(2 Pedro 2.1-17)

³Marīpu marīrē peamegue waabonerārē taurire musārē, yu maírārē būro gojaduadibu. Irire gojaduakeregu, dapagorare gajī gapure gojaro gāāmea, ārī gūñáa. Marīpu āārīpererā ígūyarārē Jesucristoya kerere: “Āsū āārā, irire neō gorawayubirikōāka!” ārī pídi āārímí. Marī ígūyarā iri kerere buremua. Gajirā ārīkatori merā buerimasā gapū iri kerere gorawayuduama. Irasirigu yu musārē: “Ígūsā ārīkatori merā buerire pēbirikōāka!” ārī gojáa. Ígūsārē: “Marīpu guare pídea diayeta āārā, musā buerī gapū ārīkatori merā buerī āārā”, ārīka! ⁴Ígūsā ñerā, masīña marīrō musā pūro ejanerā musā merā āāríma. Ígūsā ārīkatori merā: “Marīpu marī ñerō irideare kātimi, irasirirā noō gāāmerō irimasía”, ārī buema musā, ígūsā ñerī iririkurire: “Ōāa”, ārī gūñaburo, ārīrā. “Jesucristo marīrē doregu, marī Opū sugū āārīgū āārībemi”, ārī buema. Iripoegue Marīpu ígūya wenenírī gojadea pūgue ígūsā irirosū ārīkatori

merā buerārē: “Wajamoāgura”, ārīdi āārímí.

⁵Irasirigu yu musā masídeare dupaturi gūñamakū iriduáa. Iripoegue Marīpu gua ñekūsamarā Israel bumarārē Egiptogue āārírārē wiudi āārímí. Ígūsārē wiukeregu, ígūrē buremumerā gapure wējēdi āārímí. ⁶Marīpūre wereboerā āārādinērādere gūñaka! Ígūsā Marīpu doreri pídeare tarinugānerā āārímá. Ígūsārē ígū āārīdorederore āārīduabirinerā āārímá. Irasirigu Marīpu ígūsārē kōmedari merā naítīārōgue suapíkōadi āārímí. Ígū āārīpererā ñerārē wajamoārīnu ejamakū, ígūsārē būro wajamoāgukumi. ⁷Iripoegue Sodoma, Gomorra wāikurī makārī marā, irasū āārīmakū iri makārī pūro āārírī makārī marāde, Marīpūre wereboerā āārādinērā irirosū ñerō irinerā āārímá. Ūma, nome merā ñerō irinerā āārímá. Irasū āārīmakū ūma seyaro ñerō irinerā āārímá. Nomedē irasūta irinerā āārímá. Irasirigu, ígūsā ñerō iridea waja Marīpu ígūsārē soebēodi āārímí. Āārīpererā ígūsā iriderosū ígū dorerire tarinugārā pēbiri peamegue wajamoāburire masīburo, ārīgū, irasiridi āārímí.

⁸Ígūsā Marīpu dorerire tarinugāderosū, ārīkatori merā buerimasā musā watope āārírā ñerō yāma. Ígūsā kērōgue íārī merā ígūsā ñerō iriduare: “Ōāa”, ārī gūñama. Irasirirā ígūsā ñerō iriri merā ígūsāya dupure poyanorēma. Marī Opū dorerire tarinugāma. Turari oparārē ñerō weneníma. ⁹Marīpūre wereboerā opū

^aJud 1 Mt 13.55; Mr 6.3: I pū gojadi Judas Iscariote meta āārīyupu. Ígū tīgū Santiago wāikuyupu. Peamasāya merā gajirā Santiogore “Jacobo” wāiyenerā āārímá.

Miguel wāikugu iriderosū iribema. Miguel Moiséya dupu darore āiadaugu, wātī merā gāme guaseodi āārīmī. Irasirikeremakū, Miguel gapu neō suārō ñerō wereníri merā wātírē: “Iropata irika! Peamegue waaka!” āri turibiridi āārīmī. Āsū gapu ārīdi āārīmī: “Yu Opu murē: ‘Iropata irika!’ āriburo”, ārīdi āārīmī. ¹⁰Ārīkatori merā buerimasā musā watope āārírā gapu ĩgūsā masibirideare ñerō werenírī merā werema. Waimurā pēmasimerā iririkurosū ĩgūsā noō gāamerō iriduari ditare yāma. Irasirirā peamegue beosūrākuma.

¹¹Īgūsāta neō usuyari bokabirikuma. Caín wāikugu Marīpuyare buremubi, ĩgū pagumurē ĩāturi, wējēderosū ñerō yāma. Balaam wāikugu ĩgū niyeru wajataburire, Marīpuyarāya āārīburi nemorō gūñasā, ĩgūsārē ārīkatori merā buederosū ñerō yāma. Gajigu Coré wāikugu ĩgūya bumarā oparā Marīpu pīnerārē tarinugādi āārīmī. ĩgū tarinugārī waja Marīpu ĩgūrē wajamoāgū, boamakū iridi āārīmī. Ārīkatori merā buerimasā, Coré iriderosū ñerō yāma. Irasirigu Marīpu ĩgūrē wajamoāderosū ĩgūsādere wajamoāgukumi. ¹²Musārē ārīkatori merā buerimasā, musā Jesúre buremurā nerē, bosebairipoe buremurī marīrō noō gāamerō yāma. Musā merā baa, irírā, ĩgūsāyama ditare gūñama. Ñerā oveja korerimasā ovejare baari ejomerā irirosū yāma. Īmikāyebori mirū wējāpuri merā otederogue deko merērō marīrō tariaro irirosū neō musārē iritamubema. Yuku dukakuripoe bugu yuku dukamarī yuku irirosū yāma. Masaka irigure nugūrīgue merāta duuadero puru ñaipereakōākoa. Irigu irirosū āārīma. Ōārō iririre neō irimasībema. ¹³Īgūsā ñerō guyasūrī iririkuri, sūmu guararikurire makūrī pāmujūpīdea irirosū āārā. Neñukā ĩgūsā keoro waanarōgue merā yuridijanerā irirosū āārírā, gajirārē diaye buerire tūyamakū neō iribema. Irasirigu Marīpu: “Īgūsārē āsū wajamoāgura”, ārīderosūta gajiro nemorō naītārōgue āārīnīmakū irigukumi.

¹⁴Iripoeguemu Enoc wāikugu Adán parāmerā āārīturiagu āārīdi āārīmī. Adán merā marī keopurori, Enoguere keotūnumakū, āārīpererā Adán parāmerā āārīturiarā su mojóma pere gajī mojó peru pērēbejari burigora masāporewāgānerā āārīmā. Marīpu ārīkatori merā buerimasārē ĩgū wajamoāburire Enorē weredoredi āārīmī. Irasirigu Enoc āsū āri weredupiyudi āārīmī: “Péka yure! Marī Opu wārā ĩgūyarā merā aarigukumi. ¹⁵Āārīpererā masaka ĩgūsā irideare ĩā beyegu aarigukumi. Āārīpererā ñerārē āārīpereri ĩgūsā ñerī iridea waja, irasū āārīmakū āārīpereri ĩgūrē ñerō werenīdea waja ĩgūsārē wajamoāgū aarigukumi”, ārīdi āārīmī Enoc iripoguere. ¹⁶Irasirirā ārīkatori merā buerimasā wajamoāsūrākuma. Āārīpererārē werewuarikurā, gajirā iririre: “Ōābea”, āri gūñarā āārīma. ĩgūsā ñerī waribejari ditare yāma. “Masītarinugā”, āri weregorenama. ĩgūsāyā ditare gāamesārā, gajirārē ōārō werenīkatoma.

Judas Jesúre buremurārē gojanemodea

¹⁷Musā yu maírā, marī Opu Jesucristo buedoregu pīnerā musārē buedeare gūñaka! ¹⁸Īgūsā musārē āsū ārīnerā āārīmā: “Ī ũmu pereburi dupiyuro masaka noō gāamerō Marīpuyare buridarākuma. Marīpūre gāāmemerā, ñerī waribejarire irirākuma”. ¹⁹Irire irasirirā Jesúre buremurārē gāme dukawarimakū yāma. ĩgūsā iriduarire irirā Ōāgū deyomarīgūrē neō opabema.

²⁰Musā yu maírā gapu, ōārī Jesúyare buremurírē neō piribirikōāka! Gūñaturanīkōāka! Ōāgū deyomarīgū iritamurī merā Marīpūre sērēka! ²¹Marīpu musārē maīgūrē piribirikōāka! Marī Opu Jesucristo marīrē bopoñarī merā ĩāgū ũmugasigue perebirī okari sīgukumi. Irasirirā ĩgū sīburiere:

“Oparākoa”, āri gūñaturari merā yūka!

²²Gajirā Jesúyare: “¿Diayeta āārīrī?” āri buremuturamerārē bopoñarī merā

ĩaka! Īgūsārē Jesúyare: “Diayeta āārā”,
 ārī wereka! ²³Wii ũjūrī wii poekague
 āārīrārē taurā irirosū ĩgūsārē iritamuka,
 peamegue waabonerārē waabirikōāburo,
 ārīrā! Gajirārē ñerō irimakū, bopoñarī
 merā ĩaka! Īgūsā ñerī iriri gapure
 dooka, ĩgūsārē ĩākũĩrī, ārīrā! Suríro
 gurarikurore gāāmemerā irirosū ĩgūsā
 ñerī iririre gāāmebirikōāka, irire pērērī,
 ārīrā!

Judas Marīpūre
buremurīmarē gojadea

²⁴⁻²⁵Marīpū sugū āārīgū, marī Opū
 Jesucristo merā marī peamegue

waabonerārē taugū āārīmi. Īgū
 turari merā marīrē koremasīmi,
 ñerīrē iribirikōāburo, ārīgū. Irasū
 āārīmakū ĩgū pūroguere marī
 ñerī opamerā ōārō usuyari merā
 āārīmakū irimasīmi. Irasirirā
 āārīpererā ĩgūrē: “Mū ōātarigū,
 turatarigū, āārīpererārē doregū, gūa
 Opū āārā”, ārīburo. “Neōgoragueta
 āārīnīkōādi āārīmī. Dapagoradere
 āārīnīkōāmi. Pūruguedere irasūta
 āārīnīkōāgukumi”, ārīburo. Marīde
 irasūta ārīrā!

Iropata āārā.
 Judas